



NEYTENDASTOFA

Ákvörðun nr. 22/2017

Sölu- og afhendingarbann á skoteldana BPATA, SECRETGIFT og GOLD SPARKLERS hjá E-þjónustunni

**I.
Málsmeðferð**

1.

Þann 29. desember 2016 fóru þrír fulltrúar frá Neytendastofu til E-þjónustunnar ehf. í þeim tilgangi að afla sýna á skoteldum til þess að senda til prófunarstofunnar LOM (Laboratorio oficial j.m.Madariaga) á Spáni. Tekin voru 12 eintök af BPATA rocekt (Art. Nr. P2950), sýni merkt IS-15; 12 eintök af SECRETGIFT cake, sýni merkt IS-16 og 12 eintök af GOLD SPARKLERS (Art. Nr. 0782), sýni merkt IS-17; sjá myndir í fylgiskjali með ákvörðun þessari. Send voru 10 eintök af hverjum skoteld um sig til prófunar hjá LOM m.t.t. til staðalsins ÍST EN 15957-5:2010 „Flugeldavörur og sprengibúnaður – Flugeldavörur í flokki 1, 2 og 3 Hluti 5: Kröfur um samsetningu og nothæfni.“ Einu eintaki af hverjum skoteld fyrir sig var haldið eftir hjá Neytendastofu og eitt eintak af hverjum skoteld innsiglað hjá E-þjónustunni til geymslu þar til að prófun væri lokið og prófunarskýrslur borist Neytendastofu frá LOM. Framangreind sýnataka og prófun var þáttur í sameiginlegu átaksverkefni Neytendastofu og Prosafe, sem er samstarfsnet evrpóskra stjórnvalda á sviði vöröryggis. Verkefnið beindist að því að athuga hvort framfylgt væri ákvæðum vopnalaga nr. 16/1998, sbr. lög nr. 77/2015 um breytingar á þeim lögum, svo og ákvæðum laga nr. 134/1995, um öryggi vöru og opinbera markaðsgæslu, reglum settum samkvæmt þeim og stöðlum sem gilda um framleiðslu vörunnar.

Niðurstöður prófananna, sem gerðar voru dagana 8. og 9. mars 2017, vegna staðalsins ÍST EN 15957-5:2010 leiddu í ljós að flugeldurinn BPATA sem ekki var CE-merktur uppfyllti ekki ákvæði 7.1.3 „stabilisation of flight“, 7.2.3 „angel of ascent or flight“ og 7.2.11 „projected debris“ og að skotkakan SECRETGIFT uppfyllti ekki ákvæði 6.4.1 „duration of initial fuse and reserve fuse“, 7.2.2 „functioning“, 7.2.6 „height of explosion“ og 7.2.7 „sound pressure level“. Þá stóðust stjörnuljósin GOLD SPARKLERS prófun hjá LOM en voru ekki CE-merkt auk þess sem að merkingum var ábótavant.



2.

Með bréfi Neytendastofu, dags. 11. apríl 2017, voru E-þjónustunni kynntar niðurstöður prófananna fyrir ofangreinda skotelda og óskað eftir frekari sjónarmiðum og upplýsingum vegna þeirra atriða sem þar komu fram.

Engin gögn hafa borist Neytendastofu frá E-þjónustunni vegna ofangreindra skotelda.

II. Niðurstaða

1.

Mál þetta varðar öryggi skotelda sem fluttir voru inn til landsins af E-þjónustunni ehf. Skteldarnir voru sendir í prófun til prófunarstofunnar LOM (Laboratorio oficial j.m. Madariaga) á Spáni. Niðurstöður prófananna leiddu í ljós að vörurnar uppfylltu ekki öryggiskröfur í skilningi vopnalaga nr. 16/1998, með síðari breytingum, sbr. lög nr. 77/2015, svo og ákvæðum laga nr. 134/1995, um öryggi vöru og opinbera markaðsgæslu, og gildandi staðla um flugeldavörur og sprengibúnað, ÍST EN 15957-5:2010 „Flugeldavörur og sprengibúnaður – Flugeldavörur í flokki 1, 2 og 3 - Hluti 5: Kröfur um samsetningu og nothæfni.“ Í samræmi við málsmeyferðarreglur RAPEX-kerfisins gerði Neytendastofa áhættumatsgreiningu vegna þeirra ágalla sem komu fram á prófunarskýrslu LOM. Niðurstaða greiningarinnar er að „alvarleg hætta“ (e. serious risk) er af vörunum.

Samkvæmt 2. málsl. 1. mgr. 33. gr. laga nr. 16/1998 má einungis selja, framleiða og markaðssetja skotelda sem uppfylla kröfur laganna og reglna settra samkvæmt þeim. Í 3. mgr. 33 gr. a. laganna er til þess vísað að um skyldur framleiðanda og dreifingaraðila, eftirlit og málsmeyferð fari að öllu leyti eftir ákvæðum laga nr. 134/1995, um öryggi vöru og opinbert markaðseftirlit og reglum settum samkvæmt þeim.

Samkvæmt 1. mgr. 2. gr. laga nr. 134/1995 mega framleiðendur einungis markaðssetja öruggar vörur. Þá segir í 2. mgr. sömu greinar:

„Vörur, sem ætlaðar eru til sölu, leigu eða hvers kyns annarrar afhendingar í atvinnuskyni á markaði, skulu vera þannig úr garði gerðar að þær fullnægi kröfum sem vegna almannahagsmuna eru gerðar til þeirra í lögum og reglugerðum eða stöðlum um öryggi vöru og vernd heilsu og umhverfis.“

Í 1. mgr. 8. gr. laga nr. 134/1995 er um það fjallað hvað teljist örugg vara og til hvers skuli litið við mat á því hvort vara teljist örugg. Ákvæðið er svohljóðandi:

„Örugg vara merkir sérhverja vöru sem við eðlileg eða fyrirsjáanleg notkunarskilyrði, þ.m.t. endingartíma, svo og kröfur sem gerðar eru um uppsetningu, viðhald og hvernig



hún skal tekin í notkun, telst vera hættulaus fyrir einstaklinga, heilsu þeirra og eignir enda fullnægi hún almennum kröfum sem gerðar eru vegna almannahagsmuna um öryggi og vernd heilsu, svo og umhverfis. Við mat á öryggi vörur skal einkum haft til hliðsjónar:

- 1. Eðli vörunnar, þ.m.t. samsetning hennar, umbúðir og samsetningarleiðbeiningar og þar sem við á, uppsætingar- og viðhaldsleiðbeiningar.*
- 2. Áhrif vörunnar á aðrar vörur effyrirsjáanlegt er að hún verði notuð með öðrum vörum.*
- 3. Framsetning vörunnar, merkingar og, ef við á, varnaðarorð og leiðbeiningar um notkun og förgun auk hvers kyns ábendinga eða upplýsinga um vöruna.*
- 4. Hvort varan er gerð fyrir tiltekinn markhóp neytenda sem getur stafað sérstök hætta af vörunni, t.d. börn og eldra fólk. “*

Í 2. mgr. 9. gr. laga nr. 134/1995, er nánar tilgreint hvaða vörur teljast vera öruggar í skilningi laganna en þar segir:

„Vara telst vera örugg ef hún uppfyllir skilyrði sem fram koma í íslenskum stöðlum, sem innleiða Evrópustaðla, sem tilvísun hefur verið birt i hér á landi og í Stjórnartíðindum Evrópubandalagsins í samræmi við ákvæði tilskipunar um öryggi vörur.“

Um skotelda gilda staðlarnir ÍST EN 15957 –1:2010 „Flugeldavörur og sprengibúnaður – Flugeldavörur í flokki 1, 2 og 3 – Hluti 1: Íorð; ÍST EN 15947-2:2010 „Flugeldavörur og sprengibúnaður – Flugeldavörur í flokki 1, 2 og 3 – Hluti 2: Flokkar og tegundir flugelda“; ÍST EN 15957 –3:2010 „Flugeldavörur og sprengibúnaður – Flugeldavörur í flokki 1, 2 og 3 – Hluti 3: Lágmarkskröfur um merkingar“, ÍST EN 15957 –4:2010 „Flugeldavörur og sprengibúnaður – Flugeldavörur í flokki 1, 2 og 3 – Hluti 4: Prófunaraðgerðir“ og ÍST EN 15957 –5:2010 „Flugeldavörur og sprengibúnaður – Flugeldavörur í flokki 1, 2 og 3 – Hluti 5: Kröfur um samsetningu og nothæfi“.

Í VI. kafla laga nr. 16/1998 eru ítarleg ákvæði um hvernig skoteldar skulu vera merktir en þar kemur m.a. fram að sa sem framleiðir, flytur inn eða verslar með skotelda eigi að sjá til þess að skoteldavörur séu merktar með sýnilegum, læsilegum og óafmáanlegum hætti á íslensku. Auk þessa er kveðið nánar á um merkingar í staðlinum ÍST EN 15957 –3:2010. Á stjörnuljósunum GOLD SPARKLES vantaði nafn og heimilisfang framleiðanda á vöruna eða pakkningu hennar, þá vantaði vörunúmer og upplýsingar um lágmarksaldur notanda.

Í 21. gr. laga nr. 134/1995 er kveðið skýrt á um skyldu Neytendastofu að afturkalla, taka af markaði eða banna sölu eða afhendingu á vörur, ef ljóst er að hún uppfyllir ekki reglur og kröfur sem gerðar eru um öryggi vörur enda sé ekki unnt að beita öðrum og vægari úrræðum. Þá er eftirlitsstjórnvaldi heimilt í tengslum við afturköllun, þegar vara er tekin af markaði eða bann



sett á dreifingu og sölu á vörur að skylda dreifingaraðila til að eyðileggja öll eintök vörunnar með öruggum hætti, ef nauðsyn þykir af eðli máls, sbr. 1. mgr. 22. gr. laga nr. 134/1995.

2.

Samkvæmt prófunarskýrslunum frá LOM liggar fyrir að skoteldurinn BPATA og skotkakan SECRETGIFT stóðust ekki prófanir sem gerðar voru á grundvelli staðalsins ÍST EN 15957–5:2010 „Flugeldavörur og sprengibúnaður – Flugeldavörur í flokki 1, 2 og 3 – Hluti 5: Kröfur um samsetningu og nothæfi“. Kom fram að flugeldurinn BPATA sem ekki var CE-merktur uppfyllti ekki ákvæði 7.1.3 „stabilisation of flight“, 7.2.3 „angel of ascent or flight“ og 7.2.11 „projected debris“ og að skotkakan SECRETGIFT uppfyllti ekki ákvæði 6.4.1 „duration of initial fuse and reserve fuse“, 7.2.2 „functioning“, 7.2.6 „height of explosion“ og 7.2.7 „sound pressure level“. Þá stóðust stjörnuljósin GOLD SPARKLERS prófun hjá LOM en voru ekki CE-merkt auk þess sem að merkingum var ábótavant.

Með hliðsjón af niðurstöðum prófananna og áhættumatsgreiningum Neytendastofu er ljóst að flugeldurinn BPATA og skotkakan SECRETGIFT teljast ekki vera öruggar vörur í skilningi 1. mgr. 8. gr. og 2. mgr. 9. gr. laga nr. 134/1995, sbr. og gildandi ákvæði vopnalaga nr. 16/1998, með síðari breytingum. Markaðssetning, sala og afhending þeirra er þar með óheimil skv. 1. mgr. 33. gr. laga nr. 16/1998, sbr. og 2. gr. laga nr. 134/1995. Telur Neytendastofa því með vísan til 1. mgr. 20. gr. laga nr. 134/1995, sbr. 21. gr. sömu laga, ekki hjá því komist að banna hér með alla sölu og afhendingu á umræddum skoteldum. Auk þess skal E-þjónustan, sbr. 1. mgr. 22. gr. laga nr. 134/1995, eyða öllum eintökum varanna og afhenda Neytendastofu skriflega staðfestingu og sönnun þess efnis frá Landhelgisgæslunni.

Með vísan til ofangreindra reglna leggur Neytendastofa einnig sölu- og afhendingarbann á GOLD SPARKLERS stjörnuljósin þar sem frá og með næsta sölutímabili skotelda eiga allir skoteldar að vera CE-merktir.

Sölu- og afhendingarbann þetta tekur gildi við birtingu ákvörðunarinnar. Tryggja skal eyðingu skoteldanna í samræmi við ákvörðun þessa svo fljótt sem verða má og eigi síðar en þremur mánuðum frá birtingu hennar.

Neytendastofa bendir á að samkvæmt 1. mgr. 25. gr. laga nr. 134/1995, varðar það dagsektum, allt að kr. 50.000 á sólarhring, ef ekki er farið að fyrirmælum stofnunarinnar.



III.
Ákvörðunarorð:

„E-þjónustan ehf., Laugalind 3, 201 Kópavogi, er með vísan til 1. mgr. 20. gr., sbr. 21. gr., laga nr. 134/1995, um öryggi vöru og opinbert markaðseftirlit, sbr. og 3. mgr. 33. gr. a. vopnalaga nr. 16/1998, bannað að selja eða afhenda skoteldana BPATA, SECRET GIFT og GOLD SPARKLERS. Með vísan til 1. mgr. 22. gr. laga nr. 134/1995, um öryggi vöru og opinbert markaðseftirlit, skal E-þjónustan ehf. eyða öllum eintökum vörunnar sem kunna að vera til á lager. E-þjónustan ehf. skal jafnframt senda Neytendastofu skriflega staðfestingu og sönnun um að öllum eintökum vörunnar hafi verið eytt af Landhelgisgæslunni.

Bann þetta tekur gildi við birtingu ákvörðunarinnar.“

Neytendastofa, 6. júlí 2017

Tryggvi Axelsson
Forstjóri

Þórunn Anna Árnadóttir

Fylgiskjal



BPATA skoteldur



Secret gift skotkaka



Gold sparkler stjörnuljós